

Erich Bolinius

(Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 8.12.2011 18.00 Uhr auf 94.0 bzw. 87,7)

Moin, leev Toehörers,

wassen se ok so gespannt, wo Kickers Emden na de Upregen in de Dagen för dat Spöl in Heeslingen spölte? Ik löv wall, dat all de, de an Foetball interessiert sünd, lesd Sönndag skarp up dat Resultat wassen.

De Hauptsak för mi was, dat de Mannskupp overhoopt spölt hett. Dorna sach dat ja neet ut, wenn man dat, wat in de Bladen (Zeitungen) schreven wurr, löven dee. Man ik was van Anfang dorover overtügt, dat lesden Enn de Spölers uplopen denen. Se hemmen einfach de Insolvenzverwalter un de Verspreken van de Lü, de noch in de Vereen de Verantwordten dragen, vertraut.

In Heeslingen hull Kickers-Torwart **René Carstens** mit best Paraden so goed, dat dat Spöl blot mit 0:2 verloren gung. „He was uns best Mann“, see dann ok Kickers-Trainer **Uwe Groothuis** na dat Spöl. Ok wenn dat Spöl verloren wurr, was de Trainer mit dat Spöl toefree, wall se as ´n Eenheit uptreden was.

De Heeslingers settensten Kickers van Anfang an unner Druck. All in de eerst Minuten harr Heeslingen best Kansen för Toren. Man Torwart Carstens pareerte twee hart Skoeten van Daniel Grimm heel best. Man in de 31. Menüte full dann doch dat Tor för de Gastgever. Na ´n lang Flank stoppte de Spöler **Thomas Johrden** de Ball mit de Borst un skoot dann mit ´n Volleyskoet ut 14 Meter de Ball in dat Emder Tor. Groothuis meente, wenn **Navid Ali Torabian** ehrder ingrepen harr, dann was dat Tor neet fallen.

Malte Müller und **Bernd Grotluschen** spölten in ´t Middelfeld un rünten goed of. Man na vörn leep dat för Kickers neet goed. In de 25. Menüte harr dat ansük ´n Elfmeter för Kickers Emden geven muss, nadem Störmer **Andreas Gerdes-Wurpts** umhauen worden was. In de 42. Menüte was de Utglik bold glückt. Man ´n Koppball van Bernd Grotluschen kunn de Torwart noch nettakkraat hollen. In de Halvtiedpaus muss Andreas Gerdes-Wurpts, de al mit Meppen verhannelt hett, behannelt worden. He harr sük an de Hand bi ´n Stört so sehr daan, dat he in ´t Krankenhaus van Zeven brocht worden muss. De Docters stellten ´n Haarreet fast. In de 2. Halvtied was Heeslingen overlegen. In de 76. Menüte full dann ok dat 2:0 för de Gastgever. In de 87. Menüte wurr dann dat Spöl wegen ´n Hagelskuur unnerbroken. Man na fiev Menüeten kunn dat dann glückelderwies wieder gahn un dat Spöl toe Enn brocht worden. So bruukte Kickers Emden, de mit 14 Spölers na Heeslingen anreist was, neet noch maal de Fahrt up sük nehmen.

Na disse Spöl hett sük so eeniges daan. De Spölers hemmen dat meeste Geld, wat hör toesteiht kregen. Se sünd toefree, so as man hören un lesen kann. ´n Fründkring (Freundeskreis), so as Upsichtsraatsvorsitter **Klaus Strahmann** dat ankündt harr, hett dat Geld för een Maand vörskoten. Dat is doch ´n goed Teken, dat de Saison toe Enn spölt worden kann. Dat Klaus Strahmann immer weer so angrepen word, finn ik neet in Rieg. He deit mit Hartbloed sük för Kickers insetten, de Vereen, de sien Vader **Fritz** mit grünndt hett.

In ´t Fanforum un in facebook geiht dat deelwies hoog her. De Journalist **Jörg-Volker Kahle** hett mit ´n groot Bericht over Kickers Emden in dat Emder Bladd (Emder Zeitung) de Diskussion weer anführt. Bült stimmt ok na mien Menen, aber eeniges seh ik anners – un mit mi ´n Bült Fans un ok Günter Schmalzer, de sien Menen dorover in facebook seggt hett.

Ik hoop, dat Kickers Emden disse noch immer gefahrelke Krise oversteiht - un dat de Vereen dorna weer in betere Fahrwater kummt.

Of mörgen tegen Osterholz-Scharmbeck spölt word, dat weet ik neet, dat könt de Moderatoren hier in d` Studio seker genauer seggen. Is ja ´n Bült Water in de lesd Dagen runner komen – un de Platz in de Oostfreesland-Stadion kann neet völ Water of. Wenn spölt worden sullte, dann bün ik fast dorvan overtügt, dat Kickers dat Spöl winnt.

So, toelesd as immer, ´n lüttje Foetballwitz:

De Frau van Mario Gomez in de Hochtiedsnacht: „Ik mutt di wat gestahn, ik hebb Asthma.“

Mario: „Een Glück, ik doch al, du fleitst mi ut!“

So leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.